

**IZVJEŠTAJ O PROVEDENOJ JAVNOJ RASPRAVI
NA NACRT ODLUKU O IZMJENI ODLUKE O PODIZANJU SPOMENIKA
BOSANSKOM KRALJU TVRTRKU I KOTROMANIĆU**

U skladu sa Zaključkom Gradskog vijeća Grada Sarajeva, broj: 01-GV-02-291/23 od 26.04.2023. godine, provedena je javna rasprava na Nacrt Odluke o izmjeni Odluke o podizanju spomenika bosanskom kralju Tvrtku I Kotromaniću.

Pozivi za učešće u javnoj raspravi su, u skladu sa navedenim Zaključkom, upućeni sljedećim subjektima:

- Općina Novo Sarajevo
- Zavod za planiranje razvoja KS
- Klubovima vijećnika u Gradskom vijeću Grada Sarajeva
- linkom na web stranici Grada Sarajeva svim zainteresovanim
- Primjedbe, prijedlozi i sugestije iznesene na sjednici Gradskog vijeća kao i zaključci Komisije za spomenike smatraju se prilogom javne rasprave

Javna rasprava je trajala 7 dana, odnosno do 11.05.2023. godine.

U javnoj raspravi učešće su uzeli sljedeći subjekti:

1. Zamjenik predsjedavajućeg Gradskog vijeća Grada Sarajeva Dragan Stevanović
2. Općina Novo Sarajevo

1. Zamjenik predsjedavajućeg Gradskog vijeća Grada Sarajeva Dragan Stevanović

Zahvaljujem. Ja bih molio poslije diskusije da mi malo pobliže objasnite, jer sam to pokušao na kartama da nađem, ali nisam uspio da nađem, osim u odluci navođenje Katastarske čestice, u čemu se baš ne snalazim. Kuda tačno ide isključiva granica historijskog urbanog krajolika grada Sarajeva, znači u općini Novo Sarajevo. Bilo je riječi da je to otprilike linija ove ulice koja ide ispred zgrade Parlamenta i na most Suade i Olge. Ovaj, onaj smo evo saznali da ide skroz do muzeja, pa da znam tačno kuda ide ta granica. Zbog mogućih drugih prijedloga i u sklopu rasprave, ono što je apsolutna činjenica je da ovo jeste ne političko, nego politikantsko pitanje koje ljudi koji bi trebali da se bave strukom, bave se nečim što je apsolutno degutantno i politikantski. Nije ni politika, politika je ozbiljan posao. Kralj Tvrtko I jeste bosanski kralj, jeste srpski kralj, jeste hrvatski kralj. U to doba kad je vladao je zaista objedinio te tri, uslovno rečeno, nacije, jer još uvijek nisu bile u obliku formiranih nacija, i imao je pod svojom vlašću od primorja do Raške, uključujući i genetsko porijeklo od porodice Nemanjić, Zrinski pa možda i od nekih tadašnjih velikaških kraljevskih porodica iz Mađarske i Saske. Premda tome, ova sva priča o politizaciji je priča o politizaciji, to je još jedan primjer kako mi nakaradno formiramo državne komisije. Kako olako donosimo odluku da iz njih isključimo strance. I kako se onda zapetljamo u cijeloj ovoj situaciji u kojoj danas jesmo. Ja ću odluku početi sa sugestijom da se provjeri broj jedan, da li je moguće, jer i ovo smatram privremenom

mjerom. Pod firmom privremene lokacije spomenik postaviti u centru grada pa ćemo vidjeti šta će biti dalje. I broj dva da se provjeri u kojem obimu ima nadležnost državna komisija na platou ispred Muzeja zemaljskog, ovaj tako da eventualno i tu lokaciju iskoristimo kao privremenu, dok se, nadam se, ne promijene politikantske ljude

STAV PREDLAGAČA

Cijeneći izneseno, želimo istaći da je Grad Sarajevo donio Odluku o podizanju spomenika bosanskom kralju Tvrtku I Kotromaniću („Službene novine Kantona Sarajevo“, broj 24/22) u kojoj je definisao lokaciju podizanja i idejno rješenje, a prema dostupnoj lokaciji u Elaboratu o mogućim lokacijama za podizanje spomenika, odnosno u parku između zgrade Predsjedništva i Vlade Kantona Sarajevo na zemljištu označenom kao k.č. 1608 K.O. Sarajevo IV (novi premjer).

U postupku donošenja ove Odluke, nadležna služba je pribavila prethodno pozitivno Mišljenje Općine Centar, broj 08-19-1833 od 18.03.2020. godine, kao i Mišljenje Zavoda za planiranje Kantona Sarajevo, broj 08-19-4556 od 29.07.2021. godine, u kojem je, između ostalih, predložena i navedena lokacija.

U postupku ishodovanja urbanističke saglasnosti, Komisija za očuvanje nacionalnih spomenika dala je negativno Mišljenje, broj 09-04-1317 od 06.09.2022. godine, na dostavljeno idejno rješenje. U dostavljenom Mišljenju navedeno je da idejno rješenje nije u skladu Odlukom o proglašenju historijskog urbanog pejzaža Sarajeva („Službene novine BiH“, broj 1/21 I 10/21), tačnije izvodom iz priloga 5., stav (14), tačka a).

Predložena je nova lokacija koja se nalazi pored replike srednjovjekovnog stećka. Spomenik se podiže na zemljištu označenom kao k.č. 1086/2 KO Sarajevo VII. U toku postupka donošenja ove izmjene Odluke, od strane trećih lica podnesena je inicijativa Komisiji za očuvanje nacionalnih spomenika da se objekat Parlamenta BiH proglasi nacionalnim spomenikom, te se moralo odustati od daljnjih procedura donošenja odluke. Naime podnošenjem ove inicijative, objekat i plato na kojem se planirao podići spomenik, postali su zaštićen od bilo kakvih izmjena do konačne odluke Komisije za očuvanje nacionalnih spomenika na predmetnu inicijativu.

Nadalje, predložena je nova lokacija koja se nalazi na pješačkom ostrvu preko puta SCC-a, na zemljištu označenom kao k.č. 1102 KO Sarajevo VII. Lokalitet je predložen, jer omogućava sagledivost spomenika sa svih strana, a u blizini je državnih institucija. I na ovu predloženu lokaciju dobili smo negativno mišljenje predstavnika iz RS-a u Komisiji za očuvanje nacionalnih spomenika, te se odustalo od iste.

Konačno, kako bi se ovaj projekat realizovao, razmatrane su preostale adekvatne lokacije van zone HUK-a, te smo se odlučili za najbolji mogući izbor lokacije u ovom trenutku, a to je na Pofalićima uz glavnu saobraćajnicu na zemljištu označenom kao k.č.4223/1 k.o. Novo Sarajevo I.

Zadržava se isto prethodno usvojeno idejno rješenje uz izmjenu lokacije.

Ostale odredbe prethodno usvojene Odluke o podizanju spomenika bosanskom kralju Tvrtku I Kotromaniću („Službene novine Kantona Sarajevo“, broj 24/22), ostaju nepromijenjene.

Obzirom na prethodno navedeno, jasno je da su se desile opstrukcije od drugih nivoa na realizaciji ovog projekta. Grad Sarajevo predloženu lokaciju smatra privremenom, te će poduzeti napore da kad se steknu mogućnosti, iznađe bolju lokaciju za predmetni spomenik.

2. Općina Novo Sarajevo

Poštovani,

Vezano za akt Službe za urbano planiranje, investicije, stambene i komunalne poslove Grada Sarajevo, broj: 09-04-3920-1/23 od 04.05.2023. godine, kojim je dostavljen Zaključak Gradskog Vijeća broj:01-GV-02-291/23 OD 26.04.2023. godine sa Nacrtom Odluke o izmjeni Odluke o podizanju spomenika Bosanskom Kralju Tvrtku I Kotromaniću, a u toku javne rasprave, Služba za oblast prostornog uređenja i urbanizma Općine Novo Sarajevo daje slijedeću primjedbu:

- u članu 1. Nacrta Odluke o izmjeni Odluke o podizanju spomenika Bosanskom Kralju Tvrtku I Kotromaniću pogrešno je navedena katastarska čestica, koju je potrebno ispraviti, tako da umjesto „4223 k.o. Novo Sarajevo I“, treba da stoji „k.č.4223/1 k.o. Novo Sarajevo I“.

Navedeno je utvrđeno uvidom u kopiju katastarskog plana Općine Novo Sarajevo, kao i u Idejni projekat koji je dostavljen uz Zahtjev za izdavanje urbanističke saglasnosti za izgradnju predmetnog spomenika.

STAV PREDLAGAČA

Cijeneći izneseno, Grad Sarajevo uvažava sugestiju te će se odluka izmijeniti u ovom smislu.